

Kigbanj ki Pɔɔl ŋmee ki tii EFESUS YAAB na

¹ Min Pɔɔl, u ye Yesu Kristo aakpambal Uwumbɔr aageehn pu na, le ŋmee kigbanj kee tii Uwumbɔr aaninyaam bi bi Efesus aatiŋ ni, ki joo waasan mbamɔm, ki kpaan Yesu Kristo chee na.

² Tite Uwumbɔr ni Tidindaan Yesu Kristo ŋa tinyoor ŋa ni pu, ki tii nimi nsuudoon.

Uwumbɔr aah tii timi Waafuur Nyaan aanyoor pu na

³ Cha ti pak Uwumbɔr, u ye Tidindaan Yesu Kristo Aate na. Taah kpaan Kristo ni na, le Uwumbɔr ŋa tinyoor ŋa ti pu, ki tii timi Waafuur Nyaan aapiin mɔmɔk paacham.

⁴ Uwumbɔr aah kaa nan kee naan dulnyaa wee buyoonn na, le u nan nyan timi, Kristo pu, ke ti li ye waanib, ki li bi chain, ki taa li kpa taani ubaa unimbiin ni. U gee timi la. ⁵ Taah kpaan Yesu Kristo chee na, le Uwumbɔr ŋa timi waabim. N-yaayoonn na, u nan nyan timi ke ti li ye waabim. Nima le ye waageehn, ki ye waah ban pu na.

⁶ Waabogeehn pu le u ŋa tinyoor sakpen ŋa ti pu, nima le ti pak u ki nyuŋni u waabulchinn sakpenn pu.

⁷ Kristo aasin pu, le Uwumbɔr gaa timi lii, ki di cha pinn timi, ki ŋa timi tibulchinn sakpen, ⁸ ki ŋa tinyoor sakpen ŋa ti pu, ki tii timi nlan mɔmɔk, ni mbeen mɔmɔk, ⁹ ki kpiir tibɔbɔrkaan ti u nan dak usui ni ke u ga ŋa ti na mɔk timi. Kristo pu le u kpiir ti. Waageehn le na. ¹⁰ Tibɔbɔrkaan ngbaan le ye ke ni yaa nan ŋeer kan, u ga di tiwan nimɔk bi paacham ni taab na kpaan tɔb chee, ki ŋa ni kimɔbaan, ki ŋa Kristo ni mɔmɔk aayidaan.

¹¹ Uwumbør aah ɲani tiwan məmək pu na, u ɲani waageehn, waah dak pu na la. Taah kpaan Kristo ni na, le Uwumbør ɲa timi waanib. N-yaayoonn na, le u nan nyan timi ke ti li ye waanib. ¹² U nyan timi bi puen kpa limakl Kristo pu na, ke ti li mək binib waah ɲan sakpen pu na, aan bi pak u.

¹³ Ni mu gaa Kristo ki kii la. Naah ɲun Uwumbør aabør ti ye mbamøn, ki ye tibɔnyaan ti cha ni ɲmar na, le ni gaa Kristo ki kii. Naah kpaan u ni na, le Uwumbør tii nimi Waafuur Nyaan, ke waah nan puu tipuur ti na, ki mək ke ni ye waanib la. ¹⁴ Waah tii timi Waafuur Nyaan na, nima le mək ke u ga tii timi waah puu tipuur ti na məmək, ki ga gaa timi bimək ye waanib na lii. Nima pu na, cha ti li pak u, waah ɲan sakpen pu na.

Pɔɔl aah mee Uwumbør pu na

¹⁵ M ɲun naah gaa Tidindaan Yesu ki kii, ki gee waanib məmək pu na, ¹⁶ nima le m dooni Uwumbør ni pu n-yoonn məmək, ¹⁷⁻¹⁸ ki teer nimi maameel ponn ni. Tite Uwumbør, u ye Tidindaan Yesu Kristo Aawumbør, ki yeh lisil məmək na aah woln ninimbil pu na, m mee u ke u tii nimi Waafuur Nyaan mu ga tii nimi nlan, ki kpiir Uwumbør aah bi pu na mək nimi na, aan ni bee u mbamøn, ki bee waah yin nimi ki tii nimi limakl pu na, ki bee waah ga tii waanib paacham aawan ni mɔ sakpen na pu na, ¹⁹ ki bee ke u kpa mpɔɔn sakpen ki ti nyarɲ, ki tii timi bi gaa u ki kii na. Mpɔɔn ngbaan le ye mpɔɔn sakpiin ²⁰ mu u nan di fikr Kristo nkun ni, ki di u kaan uɲangii wɔb paacham na. ²¹ Uma Kristo bi nima ki kpa mpɔɔn mu jer mpɔɔn məmək na: u kpa mpɔɔn jer inyək, ni ɲiwaa, ni bipɔnib aapɔɔn, ki kpa tininkpir jer tininkpir məmək, ki kpa mpɔɔn jer dindatiib aapɔɔn məmək. Waayimbil jer ɲiyimbil ɲimək bi dandana wee na, ni ɲimək ga li

bi n-yoonn mu choo na. ²² Uwumbør di tiwan mòmøk di ɲa uma Kristo aataapotan taab, ki ɲa u tiwan mòmøk aayidaan ki tii waanib. ²³ Waanib le ye uma Kristo aawon, le u gbii bi, ki mu bi tiwan nimøk bi ɲipepel mòmøk na ni.

2

Naah nyan nkun ni ki kan limɔfal pu na

¹ U tii nimi limɔfal la. Ni nan tun titunwanbir, kaa nan kii Uwumbør aamøb, nima le naa nan kpa limɔfal. ² Ni nan dii dulnyaa aasan mu kaa ɲan na, ki kii kinimbɔɲ ki ye tiwanbir mòmøk aayidaan na aamøb. Kima le joo binib bi yii Uwumbør aamøb na. ³ Ti mòmøk mu nan bi bi ponn ni, ki mu dii taah ban tiwan ni kaa ɲan na pu na, ki ɲani tisui ni tiwon aah gee pu na. Taah nan bi pu na le nan cha Uwumbør gee liɲuul ti pu, ke waah gee liɲuul titunwanbirdam biken pu pu na.

⁴ Tɔ, Uwumbør mu kpa linimbaasaln sakpen, ki gee timi sakpen. ⁵ Taah nan tun titunwanbir na, taa nan kpa limɔfal. Taah kpaan Kristo ni na, le Uwumbør tii timi limɔfal. Waanimbaasaln pu le u gaa nimi lii. ⁶ Taah kpaan Yesu Kristo ni na, le Uwumbør kpaan yoor timi ni uma Kristo, ki cha ti ti kal u chee paacham. ⁷ N-yoonn mu choo na, nima le ga mæk ke Uwumbør kpa linimbaasaln sakpen, ki gee timi ki ti nyan, Yesu Kristo pu. ⁸ Naah gaa Yesu ki kii pu na, le ni ɲmar, Uwumbør aanimbaasaln pu. Naa ye nimi nibaa pu le ni ɲmar. Ni ye Uwumbør aapiin la. ⁹ Naa ye nimi aatunyaan pu le ti ɲmar, ubaa taa li kpa kipupuk. ¹⁰ Ti ye Uwumbør aawanaankaan la. Taah kpaan Yesu Kristo ni na, le Uwumbør ɲa timi binipəm, ke ti li tun lituln li ɲan na. U nan di lituln ngbaan siin kiir timi, ke ti nan tun li.

Nimi ni Yesu Kristo kpaan la

¹¹ Nimi bi kaa ye Juu yaab na, Juu yaab yin nimi binib bi kaa geei njichakpan na, ki yin bibaa bichakpangeeb; ba pu? bi geei njichakpan. Ni teer man, naah nan bi pu n-yoonn mu jer na. ¹² N-yoonn ngbaan, naa nan kpaan Kristo chee, kaa nan ye binib bi Uwumbər nyan bi na ponn ni bibaa, kaa nan bi tipuur ti Uwumbər nan puu tii bi na ni. Ni nan bi dulnyaa wee ni, kaa nan kpa limakl, kaa nan nyi Uwumbər. ¹³ Le dandana wee, naah kpaan Yesu Kristo ni na, nimi bi nan daa Uwumbər chee na duun u chee dandana wee, Kristo aasin pu. ¹⁴ Uma pu le kimobaan bi. U nan di timi Juu yaab, ni binib bi kaa ye Juu yaab na kpaan unibaan, ki gbaa wii ligoln li nan bi tikaasisik ni na. ¹⁵ Waah kpo na, u kuln kiduŋ ki nan bi ti ni bikaasisik ni na. U kuln Juu yaab aakaal ni baakoobil, ki di timi Juu yaab, ni binib bi kaa ye Juu yaab na kpaan ŋa linibopɔln libaa, bi kpaan u ni na, nima le ti ŋa kimobaan. ¹⁶ Waah kpo ndɔpuinkoo pu na, u di timi ni bima, ki kpaan linibol libaa, ki giin bi Uwumbər chee, bi ni Uwumbər ti kpaan ki ŋa kijɔtiik. Waah ŋa kina na, le u kuln kiduŋ ki nan bi ti ni bikaasisik ni na. ¹⁷ Kristo nan dan ki nan tuk nimi bi nan daa Uwumbər chee na, ni Juu yaab bi duun u chee na, ke u ga ŋa nimi, ni Juu yaab, ni Uwumbər kijɔtiik. ¹⁸ Kristo pu, le binib bi ye Juu yaab na, ni binib bi kaa ye Juu yaab na mɔmɔk kpaani Uwumbər Aafuur Nyaan baan ni, ki dan Tite Uwumbər chee.

¹⁹ Nima pu na, nimi bi kaa ye Juu yaab na aa ki ye biwɔwɔm ni bicham Uwumbər aanib chee. Ni ye Uwumbər aanib ponn ni bibaa, ki ye waamaal mu ponn ni bibaa la. ²⁰ Nimi Yesu aanib naahn kidiik la. Bi maa nimi lidinyikl li ye Yesu aakpambalb ni Uwumbər aabɔnabtiib na pu la. Yesu Kristo ubaa le ye lidinyikl ngbaan aatakpaan. ²¹ Uma pu le kidiik aawan mɔmɔk tɔŋ tɔb pu, ki ŋa kidiik ki bi chain na, ki tii u. ²² Naah kpaan

u ni na, ni mu ye kidiik ngbaan aawan ponn ni nibaa, ki ŋa kidiik ki Uwumbɔr Aafuur Nyaan bi ki ponn ni na.

3

Pɔɔl aah tuk binib bi kaa ye Juu yaab na tibɔnyaan pu na

¹ Nima pu na, min Pɔɔl mee Uwumbɔr tii nimi la. M ye Yesu Kristo aayom, nimi bi kaa ye Juu yaab na pu. ² M dak ke ni ga li ŋun Uwumbɔr aah san mi kinimbaak pu ki cha m tuk nimi waah gee nimi pu na. ³ U nan kpiir tibɔbɔrkaan mɔk mi. M puun ŋmee ti kigbaŋ kee ponn ni siib. ⁴ Ni yaa karn maah ŋmee pu na kan, ni ga bee maah nyi Kristo aabɔbɔrkaan pu na. ⁵ Uwumbɔr aa nan kpiir tibɔbɔrkaan ngbaan mɔk n-yaayoonn na aanib. Dandana wee le Waafuur Nyaan kpiir ti, ki mɔk Yesu aakpambalb ni waabɔnabtiib bi bi chain na. ⁶ Tibɔbɔrkaan ngbaan le ye ke timi Juu yaab, ni nimi bi kaa ye Juu yaab ki gaa Yesu aabɔnyaan tee na, ga kpaan ki yakr Uwumbɔr aawanyaan, ki kpaan ki li ye Yesu Kristo aanib, ki kpaan ki li bi Uwumbɔr aah nan puu tipuur ti na ni, Yesu Kristo pu.

⁷ Uwumbɔr aanimbaasaln pu, le u san mi kinimbaak ki ŋa mi tibɔnyaan tee aatutunn, ki tii mi mpɔɔn ke m tun lituln ngbaan. ⁸ Maa pii Uwumbɔr aaniwaatiir ubaa, le u mu tee tii mi litunyaan limina, ke m buen binib bi kaa ye Juu yaab na chee, ki ti moon tibɔnyaan tee, ki tuk bi Kristo aah ŋan sakpen pu na, ⁹ ki kpiir tibɔbɔrkaan mɔk binib mɔmɔk, ke binib bi kaa ye Juu yaab na mu ga ŋmar. Uwumbɔr u nan naan tiwan mɔmɔk na le nan bɔr tibɔbɔrkaan ngbaan ki nan saa dandana. ¹⁰ U ŋa kina ke waatuuntiib bi bi paacham na yaa kan Juu yaab ni bi kaa ye Juu yaab na aah kpaan tɔb chee ki ŋa Yesu aanib pu na kan, bi ga bee uma Uwumbɔr aah kpa nlan mɔk aabɔŋ pu na.

¹¹ N-yaayoonn na le u nan len ke u ga ŋa kina Tidindaan

Yesu Kristo pu. ¹² Taah gaa Yesu ki kii ki kpaan u ni na, nima le ti kpa lipobil ke ti dan Uwumbør chee ki nan doon u, ki taa li san ijawaan. ¹³ Nima pu na, m garj nimi, ke ni taa cha nitaakpab yøl maah ji falaa ni pu pu na. Maafalaa le ye nimi aaterm.

Yesu Kristo aah gee timi pu na

¹⁴ Nima pu le m gbaan Tite Uwumbør aanimbiin ni. ¹⁵ Waah ye Tite na, nima le mək timi te aabimbin bamənn aah bi pu na. ¹⁶ Waah kpa mpəon sakpen pu na, le m mee u ke u tii nimi mpəon nisui ni, Waafuur Nyaan pu, ¹⁷ ki ki mee u ke Kristo li bi nisui ni, naah gaa u ki kii pu na, ki ki mee u ke ngeehm li bi ni chee mbaməm, ¹⁸ ki ki mee u ke ni ni waanib məmək ηmaa bee Kristo aah gee nimi sakpen ki ti nyarj pu na. ¹⁹ Waah gee timi pu na jer unii aah ga ηmaa bee pu na. M ban ke ni bee waah gee nimi pu na aan nimi aabimbin li bi ke waah bi pu na mbaməm.

²⁰ Waapəon aah bi tisui ni ki tun lituln pu na, u ga ηmaa ηa sakpen tii timi ki jer taah dak pu na bee taah ga mee u pu na. ²¹ Yesu Kristo aanib aah kpaan u ni na, bi li nyurj ni Uwumbør n-yoonn məmək ki ti saa dulnyaa wee aadoon, ki li nyurj ni u n-yoonn mu kaa kpa ndoon na. Amii.

4

Tiwon aah kpaan pu na

¹ Min Pəol, u bi kiyondiik ni Tidindaan pu na, m garj ni nimi, ni li dii mbaməm. Uwumbør aah yin nimi ke ni li dii u pu na, ni li dii u kina. ² Ni li sunni nibaa taab man, ki li bi suuna, ki li kpa suklaa n-yoonn məmək, ki li gee təb, ki li kpa limər təb pu. ³ Uwumbør Aafuur Nyaan aah kpaan nimi unibaan pu na, ni li pəoni nibaa man, ki li kpaan kiməbaan, ki li beenin ye unibaan. ⁴ Timi Yesu aanib məmək kpaan ki ye tiwonbaan ti ye waawon na la.

Uwumbør Aafuur Nyaan baan le bi. Uwumbør yin nimi ki tii nimi limakl libaa ke ni ga rmar. ⁵ Ti kpa Dindaan ubaa la, ki dii naadii aasan mubaa la. Bi muin nimi nnyun ni Dindaan ubaa aayimbil pu la. ⁶ Uwumbør ubaa u ye ti mòmøk Aate na mu bi. U ye ti mòmøk Aayidaan ki cha ti mòmøk tun waatuln la, ki bi ti mòmøk ni.

⁷ Kristo yakr ipiin tii ti mòmøk waah ban pu na la. ⁸ Ni rmeee Uwumbør Aagbarj ni ke,

“Waah buen paacham na u joo binaagbiib pam,

ki di ipiin tii binib.”*

⁹ Naah rmeee ke u buen paacham na, ni møk ke u puen nyan ni paacham le ki sunn ni kitiŋ kee pu, le ki nin ki gir buen paacham. ¹⁰ U sunn ni kitiŋ kee pu na mu ye u buen paacham na, ki bi rjipepel mòmøk, ki ye dulnyaa wee mòmøk, ni paacham mòmøk Aayidaan. ¹¹ Uma le tii binib ipiin. U nan nyan bibaa bi li ye waakpambalb, bibaa mu li ye waabønabtiib, bibaa mu li mooni tibønayaan tee na, bibaa mu li ye waanib aaninkpiib, bibaa mu li ye waabør aamòmøkb. ¹² Kristo le di binib ngbaan mòmøk tii timi waanib, ke bi toor timi aabimbin, ti ti tun waatuln, ki ter tøb, aan ti mòmøk li dii u mbamøm, ¹³ ki li kpaan kimøbaan, uma u ye Uwumbør Aajarøøn na aasan ni, ki bee u mbamøm, ki chikr waasan ni, ki li kpa mbimbinyaan ki ti doo, uma Kristo aah tii timi pu na. ¹⁴ Ti taa ki li ye mbim. Biŋmarjmannim bi kpa nnyamøn aalan ke bi di rjmann binib na yaa tuk nimi tibøyayan ti kaa ye Kristo aabør na kan, ni taa dii bi. ¹⁵ Ti li kpa ngeehm ki li len ibamøn man, aan timi aabimbin mòmøk li moo naahn Kristo u ye timi Aayidaan na. ¹⁶ Kristo aah joo timi pu na, le ti mòmøk kpaan tøb chee, le ki tun ter tøb waah tii ti mòmøk lituln pu na, aan ti mòmøk li moo dii u mbamøm, ki li gee tøb.

*

4:8 : Lik llahn 68.18.

Limɔfapɔln li bi Yesu Kristo ni na

¹⁷ Ni taa li dii ke binib bi kaa nyi Uwumbɔr na aah dii pu na. Tidindaan aayimbil pu, le m len tibɔr timina. Baalandak mɔmɔk ye ilandak yɔli la. ¹⁸ Binimbil aa woln. Bitafal aah pɔɔ pu na, le baa nyi Uwumbɔr. Nima le baa kpa limɔfal li Uwumbɔr tii timi na. ¹⁹ Binimbil man kidagook ni tijɔɔ aatuln pu la. Baalandak aa ki muk bi titunwanbir pu.

²⁰ Kristo aa mɔk nimi ke ni dii kina. ²¹ M nyi ke ni ɔun waabɔr ki bae waaliin i ye mbamɔn na. ²² Nima pu na, ni di cha nimi aabimbikpok mu kaa ɔnan na. Mbimbikpok ngbaan nan cha ni ban tiwan ni kaa ɔnan ki ɔmanni nimi na la. Ni taa ki li dii naah nan dii pu na man. ²³ Cha Uwumbɔr kpeln nimi aasui aan ki ɔa nimi nsuupɔɔn, ²⁴ ki yoor mbimbipɔm mu Uwumbɔr naan mu ki di tii nimi na. Mu ye mbimbinyaan, ki bi chain mbamɔm, ki naahn Uwumbɔr aabimbin la.

²⁵ Nima pu na, ni taa ki mɔni inyamɔn. Ni mɔmɔk li len ibamɔn tɔb chee. Ti yaa ɔmanni tɔb kan, ni naahn ke tiwon aawan nibaa le aah ɔmanni niken na. ²⁶ Ni yaa gee liɔuul kan, ni taa cha nimi aanjuul ngbaan tun titunwanbir. Ni taa li beenin joo liɔuul ngbaan nwiin ti lir,[†] ²⁷ ki taa tii kinimbɔɔɔ nsan. ²⁸ Binaayukb taa ki su. Cha bi di biɔaal tun lituln li ɔnan na linimaln, aan ki kan baah ban pu na, ki tii bigiim mu. ²⁹ Ni taa cha iliin i kaa ɔnan na nyan nimi aamɔi ni. Ni li len iliin i ɔnan na, i ga ter binib bi ɔun na ke bi dii Uwumbɔr aasan mbamɔm. ³⁰ Ni taa ɔnani tiwan ni ga tii Uwumbɔr Aafuur Nyaan mpombiin. Nfuur Nyaan ngbaan ye kidaan, le Uwumbɔr di daan nimi, ki mɔk ke uma le yeh nimi. N-yoonn mbaa bi ki choo, u ga nan gaa nimi lii kookoo. ³¹ Ni taa cha niponn ni li to tɔb pu; ni li nyani liɔuul nisui ni; ni taa li ɔmɔ tɔb pu tijar; ni taa li seei

† 4:26 : Lik Ilahn 4.4.

təb; ni taa cha kinanaŋ kibaa ki li bi ni chee. ³² Ni li ŋani təb tiŋann, ki li san təb kinimbaak, ki di cha pinn təb ke Uwumbər aah di cha pinn nimi, Kristo pu pu na.

5

Uwumbər aanib aabimbin

¹ Naah ye Uwumbər aabigeehm na, pək nibaa man, ki li bi ke waah bi pu na. ² Cha ngeehm li bi ni chee man, ke Kristo aah gee timi pu, ki kpo ti pu, ki ŋa kitork ki piir Uwumbər aasui, ki ŋa ti ni Uwumbər kijətiik na.

³ Naah ye Uwumbər aanib na, ni taa gər kidagook, ki taa tun tijəŋ aatuln libaa, ki taa li kpa iniman. Ni taa po len lituln limina aaboln aabər. ⁴ Ni taa len iliin i kaa ŋan na, ni kijərk aaliin, ni yaasaraapəol aaliin. Iliin imina aaboln aa ye Yesu aanib aah len i na. Ni taa len kina. Ni li dooni Uwumbər man. ⁵ Ni po nyi ke unii umək ye udagoor na, ni unii umək ye tijəŋdaan na, ni unii umək ye unimandaan na, aan koo ni Kristo ni Uwumbər aanaan ni. Unii yaa kpa iniman kan, liwangol ye liwaal la, le u dii.

⁶ Titunwanbir timina aaboln pu, le Uwumbər gee lijuul binib bi kaa kii waaməb na pu. Ni taa cha unii ubaa ŋmann nimi ki tuk nimi ke naa bir. ⁷ Ni taa dii binib bi tun kina na. ⁸ N-yoonn mbaa, ni mu nan bi mbəmbəon ni la. Dandana, naah kpaan Tidindaan ni na, ni bi nwiihn ni la. Naah bi nwiihn ni na, ni li bi mbaməm, ke nwiihn ni aanib aah bi pu na. ⁹ Binib bi bi nwiihn ni na, bi kpa mbimbinyaan, ki tun lituln li ŋan na məmək, ki dii Uwumbər aabər ti ye mbamən na la. ¹⁰ Pək nibaa man, aan ki bee tiwan ni ga piir Tidindaan aasui na. ¹¹ Ni taa kpaan binib bi bi mbəmbəon ni ki tun yəl yəl na chee man. Ni tee li sur bi man. ¹² Ti yaa po len baah tun lituln li libəol ni na aabər kan, ni ye iniməon la. ¹³ Tə, tiwan məmək yaa nyan ni mpaan pu kan, le naabimbin ga kpiir chain; nwiihn le

nyan ni tiwan məmək mpaan pu. ¹⁴ Nima pu le ti gaa ilahn ke,

“Si u dɔ geen na,
finn aan ki fikr nkun ni,
le Kristo ga li wiin aa pu.”

¹⁵ Nima pu na, ni li nyi man, ki li bi mbaməm. Ni taa li bi ke bijərb aah bi pu na. Ni li kpa laasaab man. ¹⁶ Ni li tun Uwumbər aatuln n-yoonn məmək, ki taa li ka fam; ba pu? titunwanbir wiir dandana wee la. ¹⁷ Nima pu na, ni taa li ye bijərb man. Pɔək nibaa man ki bee Tidindaan aah ban ke ni ŋa pu na.

¹⁸ Ni taa nyu ndaan ki gbii man. Ndaan ga bii nimi la. Cha Uwumbər Aafuur Nyaan li gbii nimi n-yoonn məmək, ¹⁹ ki li gaa Uwumbər aalahn ni ilahn i bi waagbaŋ ni na tɔb chee man, ki li yikr tiwanyikrkaan, ki gaa ilahn tii Tidindaan, ki pak u nisui ni. ²⁰ Ni li dooni Tite Uwumbər n-yoonn məmək, tiwan məmək pu, Tidindaan Yesu Kristo aayimbil pu. ²¹ Tɔ, naah san Uwumbər pu na, ni li keei tɔb aamɔi.

Puutiib ni chatiib aabər

²² Bipiib, ni li keei nichatiib aamɔi, ke naah kii Tidindaan aamɔb pu na; ²³ ba pu? uja le ye upuu aayidaan ke Kristo aah ye waanib Aayidaan pu na. Kristo aanib ye waawon la. U mu gaal bi lir la. ²⁴ Bipiib, ni li keei nichatiib aamɔi tiwan məmək ponn ni, ke Kristo aanib aah kii waamɔb pu na.

²⁵ Bijab, ni li gee nipuutiib, ke Kristo aah gee waanib ki nan kpo bi pu pu na. ²⁶ U nan kpo bi pu, ke u ŋa bi chain. Baah ŋun waabər na, le u nyan titunwanbir bisui ni, le bi muin bi nnyun ni, ²⁷ ke u di bi tii uma ubaa, bi li bi u chee, ki li ŋan sakpen, ki li bi chain, ki taa li kpa tijɔŋ tibaa, ki taa li kpa taani ubaa. ²⁸ Kina le ni ŋan ke bijab li gee bipuutiib ke baah gee bibaa aawon pu na. Uja

u gee upuu na, u gee ubaa la. ²⁹ Unii ubaa aa kee nan uma ubaa aawon. U kpiini ti, ki joo ti tijann, ke Kristo aah joo waanib pu na; ³⁰ ba pu? timi Kristo aanib le ye waawon. ³¹ Ni ηmee Uwumbør Aagbaη ni ke, “Nima le cha uja ni upii nya cha bitetiib ni binatiib, ki ti kpaan tɔb chee, ki ηa unibaan.”* ³² Tibør timina le ye tibɔkpaan ti ye mbamɔn na, le m di tibør ngbaan ηaη Kristo ni waanib. ³³ Nima pu na, uja mɔk aah gee ubaa pu na, u li gee upuu mu kina. Upii mɔk mu li pak uchal.

6

Mbim ni tetiib ni natiib aabør

¹ Mbim, ni li keei nitetiib ni ninatiib aamɔi Tidindaan pu; ba pu? nima le ηan. ² Li pak aate ni aana. Nkaal ngbaan ye nkaal kpaan la. Uwumbør puu tipuur ke ni yaa kii mu kan, ³ u ga ηa tinyoor ηa ni pu, ki tii nimi limɔfafɔfɔη dulnyaa wee ni.*

⁴ Tetiib, ni taa fiini nimi aabim aajuul. Ni li joo bi mbamɔm, ki sur bi, ki tuk bi Tidindaan aabør.

Binaagbiib ni dindatiib aabør

⁵ Binaagbiib, ni li keei nidindatiib bi bi dulnyaa wee ni na aamɔi, ki li san bi, ki tun lituln mbamɔm, ke naah tun lituln pu ki tii Kristo na. ⁶ Bi yaa bi ni chee, bee bi yaa kaa bi kan, ni li tun lituln mbamɔm, ke naah ga tun tii Kristo pu na, ki taa ban ke binib pak nimi. Naah ye Kristo aanaagbiib na, ni li joo nisui mɔmɔk ηani Uwumbør aageehn, ⁷ ki li kpa mpopiin ki tun lituln tii nidindatiib, ke naah ga tun pu tii Tidindaan na, naa ye binib. ⁸ Teer man ke unii umɔk tun litunyaan na, u yaa ye unaagbiija, bee u yaa kaa ye kan, Tidindaan ga tii u waatuln aapar.

* ^{5:31} : Lik Mpiin 2.24. * ^{6:3} : Lik Nnyam 20.12; Ikaal 5.16.

⁹ Dindatiib, ni mu li ɲani nimi aanaagbiib mbamɔm, ki taa faani bi, ki li nyi ke ni ni nimi aanaagbiib kpaan Dindaan baan le paacham. Uma aa pak ubaa ki jer uken.

Tijawan ti Uwumbɔr tii timi na

¹⁰ Nnaabitiib, gbelngbeln yaan le ye ke Tidindaan aah kpa mpɔɔn sakpen pu na, ni li kpa mpɔɔn mu u tii nimi na. ¹¹ Yoor man tijawan timɔk Uwumbɔr tii timi na. Nima le ga cha ni ɲmaa yii kinimbɔɲ aanyamɔn aalan. ¹² Naa ye binib le ti jaa kijaak. Ti jaa kinimbɔɲ aanikpiwanbir ti bi paacham ki kpa mpɔɔn ki joo dulnyaa aanib bi bi mbɔmbɔɔn ni na le kijaak. ¹³ Nima pu na, ni yoor tijawan timɔk Uwumbɔr tii timi na. Nima le ga cha ni yii kinimbɔɲ, ki nyarɲ ki, ki li beenin si bundaln ki ga jan nimi kijaak na.

¹⁴ Nima pu na, gor nibaa man ki ti jan kijaak. Ni li joo Uwumbɔr aabɔr ti ye mbamɔn ki naahn ligbapapaln na; ki li kpa mbimbinyaan mu bi ke tikur ti bii kibirɲ pu na; ¹⁵ ki li tak ɲinaatak ɲi ye tibɔnyaan ti tii timi nsuudoon na; ¹⁶ ki li ɲani Yesu Kristo naadii, naadii bi ke kipeln ki ga kiir kinimbɔɲ aapiin i wu ke mmii na; ¹⁷ ki li chik tikur aayikpupuk ki ye Uwumbɔr aapɔɔn mu gaa nimi lii na; ki yoor Uwumbɔr aabɔr ti naahn kijaak aajuk ki Waafuur Nyaan di tii timi na; ¹⁸ ki li mee Uwumbɔr ki gaɲni u ke u ter nimi. N-yoonn mɔmɔk ni li mee u mbimbin mɔmɔk pu. Waafuur Nyaan aah mɔk nimi pu na, ni li mee u kina, ki taa geeni man, ki taa di cha man. Ni li mee u n-yoonn mɔmɔk ki tii waanib mɔmɔk, ¹⁹ ki li mee u ki tii m mu, ke u mɔk mi maah ga len pu na, ki tii mi lipobil ke m waar mmɔb ki tuk binib tibɔnyaan tee aabɔbɔrkaan. ²⁰ M si Yesu aasisiyyaan, ki bi kiyondiik ni, tibɔnyaan ngbaan pu la. Nima pu na, ni li mee Uwumbɔr ke u tii mi lipobil, ke m tuk binib tibɔnyaan ngbaan, maah ba ga tuk bi pu na.

Kookoo aadoon

²¹ Tinaabogeehn Tikikus u ye Tidindaan aatutunn bamõnn na le ga tuk nimi maabõr mãmæk, le ni bee maah bi pu na. ²² Nima le m cha u dan ni chee, ke u nan tuk nimi taah bi pu na, aan ki sɔŋ nisui.

²³ Tite Uwumbõr ni Tidindaan Yesu Kristo tii tinaabitiib nsuudoon, ki cha ni li gee tɔb ki gaa u ki kii mbamãm.

²⁴ Tidindaan Yesu Kristo ŋa tinyoor ŋa binib bimæk gee u n-yoonn mu kaa kpa ndoon na pu.

Uwumbør aagbar
Bible without Deuterocanon in Konkomba

copyright © 2014 Wycliffe Bible Translators, Inc.

Language: Konkomba

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2014, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Konkomba

© 2014, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

